

**ჩარჩო შეთანხმება  
ვაჭრობისა და ინვესტიციების შესახებ  
ამერიკის შეერთებულ შტატებსა და  
საქართველოს შორის**

ამერიკის შეერთებული შტატების მთავრობა და საქართველოს მთავრობა (თითოეული ცალკე მოხსენიებული როგორც “მხარე” და ერთად მოხსენიებული როგორც “მხარეები”):

სურთ რა მხარეებს შორის გააღრმავონ მეგობრული კავშირები და თანამშრომლობა, გააფართოვონ ვაჭრობა და გააძლიერონ ეკონომიკური ურთიერთობები;

აღიარებენ რა საერთაშორისო ვაჭრობისა და ინვესტიციებისათვის ღია და პროგნოზირებადი გარემოს ხელშეწყობის მნიშვნელობას;

აღიარებენ რა, რომ მხარეებს შეუძლიათ მიიღონ სარგებელი გაზრდილი საერთაშორისო ვაჭრობისა და ინვესტიციებისაგან, და რომ ვაჭრობის ხელშემშლელმა საინვესტიციო ღონისძიებებმა და პროტექციონისტურმა საეაჭრო ბარიერებმა შესაძლოა შეამციროს ეს სარგებელი;

ცდილობენ რა ხელი შეუწყონ გამჭვირვალობას და აღმოფხვრან მექროთამეობა და კორუფცია საერთაშორისო ვაჭრობისა და ინვესტიციების სფეროში;

აღიარებენ რა კერძო ინვესტიციების, მათ შორის, როგორც შიდა, ისე უცხოური ინვესტიციების აუცილებელ როლს შემდგომი ზრდისათვის, სამუშაო ადგილების შექმნისათვის, ვაჭრობის გაფართოებისათვის, ტექნოლოგიების გაუმჯობესებისა და ეკონომიკური განვითარების გაძლიერებისათვის;

აღიარებენ რა მათ ეკონომიკებს შორის ვაჭრობის მზარდ მნიშვნელობას მომსახურების სფეროში;

მხედველობაში იღებენ რა არასატარიფო ვაჭრობის ბარიერების შემცირების სასურველობას მათ ბაზრებზე ხელმისაწვდომობის ხელშეწყობის მიზნით;

აღიარებენ რა ინტელექტუალური საკუთრების უფლებების ადეკვატურად და ეფექტიანად დაცვისა და აღსრულების, ასევე ინტელექტუალური საკუთრების სფეროს კონვენციების წევრობისა და მათი დაცვის უზრუნველყოფის მნიშვნელობას;

აღიარებენ რა თითოეული მხარის შრომის კანონმდებლობის შესაბამისად მშრომელთა უფლებების ადეკვატურად და ეფექტიანად დაცვისა და აღიარებული საერთაშორისო შრომის უფლებების დაცვის გაუმჯობესების უზრუნველყოფის მნიშვნელობას;

სურთ რა, რომ უზრუნველყონ, რომ მათი ვაჭრობა და გარემოსდაცვითი პოლიტიკა ორმხრივად ხელს უწყობდეს მდგრად განვითარებას;

სურთ რა ერთმანეთის ტერიტორიებზე წაახალისონ და ხელი შეუწყონ საწარმოებსა და კერძო სექტორის სხვა ჯგუფებს შორის კონტაქტებს;

აღიარებენ რა მათ შორის ვაჭრობასა და ინვესტიციებთან დაკავშირებული პრობლემების რაც შეიძლება სწრაფად მოგვარების სასურველობას;

სურთ რა კიდევ უფრო გააძლიერონ მრავალმხრივი სავაჭრო სისტემა შემდგომი ორმხრივი და ორმხრივად სასარგებლო შეთანხმებების დადებით მსოფლიო სავაჭრო ორგანიზაციის ეგიდით;

აღნიშნავენ რა, რომ მხარეები არიან მსოფლიო სავაჭრო ორგანიზაციის წევრები და ადასტურებენ რა, რომ ვაჭრობისა და ინვესტიციების შესახებ ეს ჩარჩო შეთანხმება (“შეთანხმება”) არ ათავისუფლებს მხარეებს მსოფლიო სავაჭრო ორგანიზაციასთან დაკავშირებული ან ამ ორგანიზაციის ეგიდით დადებული სხვა ხელშეკრულებებით, შეთანხმებებით და დოკუმენტებით განსაზღვრული უფლებებისა და მოვალეობებისგან;

მოიხსენიებენ რა ამერიკის შეერთებული შტატების მთავრობასა და საქართველოს მთავრობას შორის დადებულ შეთანხმებას „ამერიკის შეერთებული შტატების მთავრობასა და საქართველოს რესპუბლიკის მთავრობას შორის ინვესტიციების წახალისებისა და ურთიერთდაცვის შესახებ“ (შემდგომში „ორმხრივი ინვესტიციების შესახებ შეთანხმება“), რომელიც ხელმოწერილია 1994 წლის 7 მარტს მხარეებს შორის და ადასტურებენ რა, რომ ეს შეთანხმება არ ათავისუფლებს მხარეებს ორმხრივი ინვესტიციების შესახებ შეთანხმებით განსაზღვრული უფლებებისა და მოვალეობებისგან; და

ცდილობენ რა შექმნან მექანიზმი გაძლიერებული თანამშრომლობისა და უფრო ყოველმხომცველი ხელშეკრულებების მეშვეობით მათი ვაჭრობის გაფართოების ინიციატივების შესახებ შემდგომი დიალოგისათვის;

თანხმდებიან შემდეგზე:

**მუხლი 1**

მხარეები ადასტურებენ მათ სურვილს ხელი შეუწყოთ ხელსაყრელ საინვესტიციო გარემოს და გააფართოვონ და გაამრავალფეროვონ მხარეებს შორის საქონლითა და მომსახურებით ვაჭრობა.

**მუხლი 2**

1. მხარეები ამ შეთანხმებით ქმნიან ამერიკის შეერთებული შტატებისა და საქართველოს ვაჭრობისა და ინვესტიციების საბჭოს (“საბჭო”), რომლის შემადგენლობაშიც შევლენ თითოეული მხარის წარმომადგენლები. საქართველოს მხარეს წარმოადგენს საქართველოს ეკონომიკური განვითარების სამინისტრო, ამერიკის შეერთებულ შტატებს წარმოადგენს აშშ-ის სავაჭრო წარმომადგენლის ოფისი (USTR). ორივე მხარეს შეიძლება დახმარება გაუწიონ სხვა სამთავრობო ერთეულების ოფიციალურმა პირებმა, გარემოებების შესაბამისად.
2. საბჭო შეიკრიბება იმ დროს და იმ ადგილას, როგორც შეთანხმდებიან მხარეები. მხარეები ეცდებიან, რომ შეხვდნენ სულ მცირე წელიწადში ერთხელ.

**მუხლი 3**

საბჭო:

1. განახორციელებს მხარეთა შორის სავაჭრო და საინვესტიციო ურთიერთობების მონიტორინგს, მოახდენს ვაჭრობისა და ინვესტიციების გაფართოების შესაძლებლობების იდენტიფიცირებას, განსაზღვრავს შესაბამის საკითხებს, როგორცაა ინტელექტუალური საკუთრების უფლებების, მშრომელთა უფლებების და გარემოს დაცვასთან დაკავშირებული საკითხები, რომელთა შესახებ შესაძლოა საჭირო იყოს მოლაპარაკება შესაბამის შეხვედრაზე.

2. განიხილავს მხარეებისთვის საინტერესო სპეციფიკურ სავაჭრო საკითხებსა და საინვესტიციო საკითხებს, რომლებიც არ წარმოიშვება ორმხრივი ინვესტიციების შესახებ შეთანხმებით.

3. დაადგენს მხარეებს შორის ვაჭრობისა და ინვესტიციების ბარიერებს და იმუშავეს ამ ბარიერების აღმოსაფხვრელად; და

4. საჭიროების შემთხვევაში ეცდება მიიღოს კერძო სექტორისა და სამოქალაქო საზოგადოების რჩევა საბჭოს მუშაობასთან დაკავშირებულ საკითხებზე.

#### მუხლი 4

მხარეს შეუძლია საბჭოს გადასცეს ვაჭრობასთან დაკავშირებული სპეციფიკური საკითხი, ან ინვესტიციებთან დაკავშირებული სპეციფიკური საკითხი, რომელიც არ წარმოიშვება ორმხრივი ინვესტიციების შესახებ შეთანხმებით, მეორე მხარისათვის წერილობითი მოთხოვნის გადაცემით, რომელიც უნდა შეიცავდეს ამ საკითხის აღწერას. საბჭომ მოთხოვნის გადაცემის შემდეგ სწრაფად უნდა განიხილოს ეს საკითხი, თუ მომთხოვნი მხარე თანახმა არ არის უფრო გვიან თარიღზე. თითოეული მხარე, ისეთი ზომების მიღებამდე, რომლებმაც შესაძლოა უარყოფითად იმოქმედოს მეორე მხარის სავაჭრო ან საინვესტიციო ინტერესებზე, ეცდება საბჭო უზრუნველყოს შესაძლებლობით განიხილოს ეს საკითხი.

#### მუხლი 5

ეს შეთანხმება არ ზღუდავს თითოეული მხარის კანონმდებლობით ან სხვა ნებისმიერი შეთანხმებით განსაზღვრულ უფლებებსა და მოვალეობებს.

#### მუხლი 6

ეს შეთანხმება ძალაში შედის ხელმოწერის შემდეგ.

#### მუხლი 7

ნებისმიერ მხარეს შეუძლია შეწყვიტოს ეს შეთანხმება მეორე მხარისათვის შეთანხმების შეწყვეტის შესახებ შიტყობინების გაგზავნით. შეწყვეტა ძალაში შევა მხარეებს შორის შეთანხმებული თარიღიდან, ან თუ მხარეები ვერ შეთანხმდებიან, 180 დღის შემდეგ შეწყვეტის შესახებ შეტყობინების გადაცემის თარიღიდან.

მოწმეთა თანდასწრებით, ქვემოთ ხელმომწერი სათანადოდ უფლებამოსილი პირები ხელს აწერენ ამ შეთანხმებას.

შესრულებულია ვაშინგტონში, 2007 წლის 20 ივნისს, ორ პირად, თითოეული ინგლისურ და ქართულ ენებზე. ამასთან, ორივე ტექსტი თანაბრად აუთენტურია.

ამერიკის შეერთებული შტატების  
მთავრობის სახელით



საქართველოს მთავრობის  
სახელით

